

四庫全書

史部

欽定四庫全書

通典卷一百三十五

唐京兆杜佑君卿纂

禮九十五 開元禮纂類三十 凶二

訃奏

皇帝為外祖父母舉哀

本司散下其禮所司隨職供辦尚舍奉御先於別殿設素牀褥席為舉哀成服位南向尚衣奉御先製小功五

月之服守宮先於舉哀殿外門之外隨便設百官文武
次如常其日舉哀前三刻諸衛屯門列仗如常諸應陪
慰者並赴集次所典儀於舉哀殿門外布百官位亦如
常又於殿前設諸王三品以上哭位文東武西重行北
面相對為首諸親位於文武官五品之下

皇宗親在東
異姓親在西

又於階下當御位北向設太尉奉慰位文武百官到入
次改服素服侍中版奏請中嚴亦在三刻之前尚衣奉
御以篚奉纁服升立於殿東間北面典謁引諸王百官

一品以下九品以上俱就門外位文武侍衛之官詣閤

奉迎舉哀前一刻侍中版奏外辦皇帝服素服御輿出

升別殿降輿即哭位南向坐侍衛如常至時侍中跪奏

請為故某官

若某郡君

舉哀俛伏興皇帝哭十五舉聲侍中

跪奏請哭止成服俛伏興皇帝止尚衣奉御以篋奉練

服進跪授興仍贊變服焉

於變服則權設步障已而去之

成服已侍中

又跪奏請哭俛伏興皇帝哭通事舍人引諸王文武百

官三品以上入就殿庭位舍人贊拜羣官在位者皆再

拜舍人贊哭羣官在位者皆哭十五舉聲舍人贊止羣
官在位者皆止舍人引諸王為首者一人進詣奉慰位
跪奉慰俛伏興舍人引退還本位又舍人次引百官文
武行首一人進詣奉慰位跪奉慰俛伏興舍人引退還
本位舍人贊拜在位者皆再拜舍人引三品以上退出
其四品以下位於門外者典謁贊拜贊哭贊止引退如
殿庭之儀侍中跪奏請哭止俛伏興皇帝止御輿降還
侍衛從至閤如初所司宣仗散其日晡哭則晡前二刻

奏嚴一刻奏辨皇帝服縗服出即位次哭如初百官自不集後朝晡凡三日而止

為皇后父母舉哀

與為外祖父母禮同其異者製總麻三月之服朝晡再哭

而止

為諸王妃主舉哀

本司散下其禮所司隨職供辦尚舍奉御先於肅章門外道東設大次南向周以行帷御座設素牀褥席守宮隨便於永安門外設文武官五品以上便次其日舉哀

前三刻侍中版奏請中嚴前二刻諸衛列仗如常典儀
於大次前量遠近設一品以下應陪集者哭位文東武
西重行北面相對為首百官皆集次改服素服就位又
於大次前設奉慰位前一刻文武侍衛之官詣閤奉迎
如常侍中版奏外辨皇帝素服御輿複道以出從幃宮
後門入之大次

其無複道者百官於外門外為位立

降即哭位南向坐侍

衛如常至時侍中跪奏請為故臣某官

若主若妃

舉哀俛伏

興皇帝哭通事舍人贊羣官拜羣官在位者皆再拜

若百

官為門外位者候入大次通事舍人引三品以上入次前位四品以下仍門外位

舍人贊哭羣

官在位者皆哭十五舉聲舍人贊止羣官在位者皆止

舍人引文武官行首皆一人詣奉慰位跪奉慰俛伏興

引退還本位舍人贊拜羣官在位者皆再拜訖

有門外位者典

謁贊拜贊哭贊止

侍中跪奏請哭止俛伏興又奏請還宮退本

位立皇帝哭止御輿降還其侍衛從至閤如常所司宣

仗散其日晡哭則晡前二刻奏嚴一刻奏辦皇帝仍初

服出位次哭如初

侍衛如常百官不集

自後本服周者凡三朝哭

而止本服大功者其日晡哭而止本服小功以下一舉

哀而止

若皇太子陪舉哀則素服左庶子啓引從帷宮南門入至大次前啓再拜訖引升東間之南北

面哭於百官哭止皇太子哭止進御座前跪俛伏興再拜於百官退引降拜還如初其宮官等應陪拜慰者則隨班於上臺自下皆然

為內命婦宗戚舉哀

與為諸王妃主禮同其三夫人以上其日仍晡哭而

止其九嬪以下一舉哀而止亦隨恩賜之深淺

為貴臣舉哀

與為諸王禮同其異者一舉哀而止貴官謂職事二品以上散官一

品其餘官亦隨恩賜之深淺

為蕃國主舉哀

與為貴臣禮同其異者城外張帷幔為次向其國而哭之至三

聲而止

臨喪

皇帝臨諸王妃主喪

本司散下其禮所司隨職供辦尚舍直長先設行宮大次於主人第大門外之西南向守宮於主人大門外隨便設諸從駕文武之官便次其所臨者五屬之親於乘輿未到之前並先集列於主人之第其執事先於其寢

北設幃幔為主人五屬婦女拜哭次其日未出宮前四

刻侍中版奏請中嚴出宮前三刻搥一鼓為一嚴

三嚴時節

前一日侍中奏裁

所司整設小駕鹵簿於所出宮門外如常儀

出宮前二刻又搥二鼓為再嚴奉禮於所出宮門外設陪從之官位如常尚舍奉御先於主人第大門外便殿之內設皇帝便座南向又於主人堂上中間設素下牀席為哭位亦南向典儀又於主人庭中設陪從官位文東武西重行北面相對為首又於御座前階下設奉慰

位主人執事於堂下設五屬之親位於東階之東重行
西面北上又設五屬婦女位於堂北幔下主女位於東
廂西面南上妻妾位於西廂東面南上衆婦人位於北
廂重行南面諸親在東相對為首

以服精麤為序而尊者差前其五屬外內

並臨於此所

諸陪從之官各常服赴集其位有司整列皇帝

四望車以下及仗衛之屬應列鹵簿者於內外如常儀
出宮前一刻又搥三鼓為三嚴侍衛之官詣閣奉迎如
常侍中版奏外辦皇帝服常服御輿以出繖扇華蓋侍

衛警蹕如常儀皇帝降輿升車黃門侍郎進當車前跪

奏稱黃門侍郎臣某言請乘輿發退復位

凡黃門侍郎奏請皆進跪

奏稱某官臣某言訖俛伏興

駕動警蹕如常黃門侍郎與贊者夾輅

以出至侍臣上馬所黃門侍郎進跪奏稱請駕權停勅

侍臣上馬俛伏興侍中前承詔退稱制曰可黃門侍郎

退唱侍臣上馬贊者承傳文武侍臣上馬畢黃門侍郎

奏稱請乘輿發退復位鑾駕動稱警蹕鼓吹不作文武

羣官應陪從者乘馬以從駕至行宮門外侍中進跪奏

請降車俛伏興退復位皇帝降車御輿就大次其輿輦
以下鈹戟仗衛之屬陳列於大次之前左右皇帝變服
素服其陪從之官各舍於便次變服素服其侍臣及武
官不變服主人相者引主人內外五屬之親各服縗服
就堂下外內位次哭典儀一人立於堂下東階東南贊
者二人立於其南少退俱西面皇帝變服訖御輿出侍
御如常主人免經去杖司儀令引出大門外望見乘輿
止哭再拜迎仍引主人先入門右西面立不哭

其未殯
即通拜

迎拜送於大門內

皇帝至堂侍中跪奏請降輿升俛伏興

於所臨喪

者非尊秩則御輿升堂

皇帝降輿升自東階即哭位坐巫祝各一

人先升巫執桃立於東南祝執蒟立於西南相向千牛四人執戈隨升二人先二人後侍臣夾升列於戶內外及階下左右其仗衛鹵簿止列於門外內如常司儀令

引主人入中庭北面典儀稱拜主人內外皆再拜勅引

主人升司儀令引主人升立於戶內之東西面侍中跪

奏請哭俛伏興與皇帝哭典儀稱哭贊者承傳唱可哭

凡典

儀有詞贊
者皆承傳

主人以下在位者皆哭典謁引諸從官應陪

臨者入即班位立定典儀稱拜從官在位者皆再拜典
儀稱哭從官在位者皆哭十五舉聲典儀稱止從官在
位者皆止典謁引諸王為首者一人進舍人接引詣奉
慰位跪奉慰俛伏興舍人引退典謁接引還本位又典
謁次引諸從官文武行首一人進舍人接引詣奉慰位
跪奉慰俛伏興舍人引退典謁引從官在位者出又典
謁次引諸王等以次出侍中跪奏請哭止俛伏興皇帝

止典儀稱哭止主人以下皆止司儀令引主人降立於庭中之東北面典儀稱拜主人以下皆再拜侍中跪奏請還宮俛伏興皇帝降御輿出侍衛警蹕如初司儀令引主人先出俟於大門外拜送皇帝至大次降輿即御座變服司儀令引主人哭還廬次皇帝停大次未發前三刻侍中版奏請中嚴所司先奏三嚴搥鼓整列仗衛鹵簿於還途如來儀奉禮於行宮南門外道左向道重行設陪從之官位文左武右陪從之官於便次變服常